



Inatsisartut ingerlatsinermut maleruagassaasa § 37 imm. 1 tunngavigalugu Naalackersuisunut ukuningga apeqquteqaateqarpunga:

**Naalackersuisunut apeqquteqaatit:**

1. Naalackersuisut kigutileriffiini aammalu kalaallit nunaanni kigutigissuunissamut qanoq takorluugaqarpat?
  - a. Meerartatta inuusuttattalu 18-nit inorlugit ukiullit kigutaasa peqqissuunissaannut suna anguniagaava?
    - i. Kigutit putoqannginnissaannik suliniutip nalilersornera sumut killippa aammalu – massakkumut – meeqqanut inuusuttunullu suliniutit sumut killippat?
    - ii. Suna peqqutaava, kigutit nallorissarnissaat Nuummiuinnaq neqeroorutigineqarnera aammalu 5.klassiuinnaq?
    - iii. Qanoq ililluni naatsorsorniarneqarsimava, meeqqat ima amerlatigisuinnaat bøjilersissinnaanerannut?
    - iv. Akialu qanoq naatsorsorneqarsimava? Siusinnerusukkut naatsorsueriaatsit paaserusuppakka allannguineranut sanilliunnissaanut.
  - b. Inersimasunut 18-nit sinnerlugit ukiulinnut kigutit peqqissuunissaannut anguniakkat uani qinigaaffimmi suuppat?
    - i. Naalackersuisut nassuiaaqquneqarput inersimasut 18-nit sinnerlugit ukiullit qassit kigutileritissimanersut ukiuni 2017, 2018, 2019, 2020 aamma 2021?
2. Naalackersuisut nalunaarutigisinnaanerlugu, sulisunut tunngassutilinnik Danmarkimi tandlægeforening suliaqarsimanersoq Kalaallit Nunaanni ilaasortanut tunngatillugu?
  - a. Taamaassimappat suliakkiutit suusimappat? (soorunami kikkuuneri ersersinnagit).
3. Naalackersuisut Nuummi kigutileriffiup allineqarnissaanik/annertusarnissaanik pilersaaruteqarpat?
  - a. Taamaassimappat pilersaarut taanna sumut killippa?
4. Peqqinnisaqarfimmi sulinermi atugassarititaasunut suliniutinik sunik aallartitsisoqarnikuua, tassani kigutileriffinnut attuumassuteqartut pineqarput, APV (Arbejds Plads Vurdering) 2018-imi saqqummiunneqarmalli?
5. Pikkorissarnerit suut aammalu piginnaasat qaffassarniarlugit pilersaarutit kigutit nakorsaannut, tandplejerinut, tandklinikassistentinut sulisunullu allanut tigutilerinermi suliaqartunut ukiut kingulliit tallimat iluanni piviusunngortinneqarnikuuppat?
  - a. Pikkorissarnerni/ilinniaqqinnissamullu pilersaarutini qassit immikkoortinneqarpat sulisunut aalajangersimasunut sivikitsuinnarmillu sulisunut?
    - i. Kiap aaliangertarpaa piginnaangorsarluni ilinniaqqinnerit/pikkorissarnerit sulisut akornanni immikkoortiterneri?



(Inatsisartunut ilaasortaq Anna Wangenheim, Demokraatit)

### Tungavilersuut

Peqqinnissaq pillugu ataatsimiititaliarsuup suliani qiteqquppa, ukiumullu affakkaartumik nalunaarusiani saqqummiullugu. Tassunga atatillugu pingaartuuvoq paasissallugu Naalakkersuisut qanoq annertutigisumik Kalaallit Nunaanni kigutigissuunissamut pilersaaruteqarnersut, ilisimatuussutikkut takutinneqarmat, assigiinngitsunik nappaateqarnerup, inuumermillu navianartorsiortitsisinnaasut akiornissaa pinaveersaartinnissaa kigutigissuunikkut qulakkeerneqarsinnaasoq.

Ataatsimiititaliarsuup nalunaarusiaata maannakkuugallartoq takutippaa, meeqqat kigutigissuunissaanut suliat iluatsittumik ingerlanneqartut. Akerlianilli inersimasut kigutigissuunissaanut kisitsisit amigaatigineqartut. Nuummik kigutileriffiit namminersortunit pigineqartut arlaqarput, tamannalu pissutigalugu ilisimangilarput, inersimasut qassit kigutileritittarnersut. Taamatullu aamma kigutileritinnissamut periarfissanut annerusumik assigiinngisitsinermik pilersitsillutik, taamatuttaaq kigutit suliaritinnissaat kikkunnut tamanut atuunnissaanik periarfissaqarnermik naatsorsuuteqarnerup ataqatigiikkunnaarnerani pilersitsillutik.

Demokraatit ajorinngilluinnarpaat namminersortunik kigutileriffeqarnera, taakkulu inuiaqatigiinni suliassap annertunersaa suliarippassuk peqqinnerunissaq anguniarlugu isumaqarluinnarpugut, misissussallugu tungavissaqartoq, tamassuma annertusarnissaa Kalaallit Nunaanni innuttaasunut tamanut atorluarnerunissaa. Qanorluunniit aqqissuusseqqinnissaq pisariaqarpoq.

Kigutit peqqissuunissaat ukiuni kingullerni politikikkut ukkatarineqarsimavoq, pingaartumik meeqqat kigutaasa narlorissartinnissaat eqqunneqaqqinnera pissutigalugu. Tassungalu atatillugu suliassat arlallit saqqummersimapput, kigutit nakorsaaniq nunaqavissunik atorfeqartitsiinnarnissaa qanoq qulakkeerneqarsinnaaneranut attuumassuteqartut, aammalu taanna qanoq unammillernarsimatigisoq sulilu unammillernartuulluni. Tamannalu aamma siusinersukut apeqquteqaatiginikuuara.

Kigutileriffinnili sulisunut sulinermi atugassarititaasut suli unammillernartoorpasippat, taakkulu uagut politikikkut isummerfigisariaqakkagut, inatsisiliatta tutsuvigineqarnissaaat piginnassagutsigu. Sulisut naammaginninngitsut, napparsimallutik sulinngitsoortartorpassuit sulinermilu atugassarititaasunut unammillernartut, pingaartumik kulturikkut aporaannerit avataaniit sulisut sulisullu nunaqavissut akornanni, sulinermi nuannarinninnissaagaluaq sunnertarpaa, taakkulu pisortat kigutileriffiisa qanoq innuttaasunut sullissinerannut sunniisinnaalluni. Tamatta soqutigisarisariaqarparput sulinermi atugassarititaasut pitsaasuunissaat innuttaasut kigutiginnerulernissaannut sinaakkusiinitsigut. Taakkulu saniatigut qulaani tungavilersuutigineqartut aammattaaq pissutissaqartilerpaa kigutit peqqissuunissaannut kigutillu peqqissuunissaannut neqeroorutit nutarternissaannut, aammalu nalunaarutit atuuttut tulluussarnissaannut pisariaqartitsisoqarnerisoq.

Apeqquteqaatima ullut suliffiusut qulit iluanni akineqarnissaaat kissaatigaara.



**DEMOKRAATIT**  
DEMOKRATERNE